

續修陝西省通志稿

第五十六冊

卷一百零六至一百零七

續修陝西通志稿卷一百六

人物三十三

列女六

三原

張氏侯子鎬妻年二十三寡姑老子甫八月康熙六十年饑饉拮据事盲姑壽終子可久成立夫堂弟子仁八歲失怙恃貧無依氏撫之爲娶妻趙氏朱元洲妻年二十七寡康熙三十一年大饑翁姑就食河南祖姑年八十同氏在家夜無燈織紵月下子早亡又撫其孫暨繼姑幼子兼育其姪年八十九卒李氏王琳妻夫亡氏年甚少絕粒屢日家人勸以姑老乃誓志守節事衰姑盡禮艱苦三十餘年乾隆三十年旌劉氏段延珍妻夫亡家甚貧姑老失明子幼氏紡績支撐勞瘁終身守節四十餘年潘氏周堆彩妻翁姑

俱老紡績以供菽水族黨逼凌忍死撫孤卒克成立伍氏生員張世霈妻霈亡截指誓守禮事翁姑教子有成苦節四十七年閻氏李承祖妻事兩世孀姑皆獲終老遺孤六齡撫之成立乾隆四十三年旌焦氏趙純禮妻年十九禮亡翁姑年老氏孝事之無子撫姪作棟爲嗣夫弟純嘏夫婦早亡亦無子又撫姪作梁以純嗣嘏茹荼飲冰貞操不二歷三十九年權氏張連璧妻夫亡翁姑衰老時夫弟尙幼奉親理家旣撫嗣子夫弟喪偶遺有子女亦撫之成立苦節四十餘年後以嗣子徵貴封恭人

王氏賀瑞麟祖母高陵生員世霖女歸麟祖諱瀛年二十四而寡時麟父僅六齡其祖姑及翁姑皆篤老日勤十指卒葬三喪撫叔姑遺子無異所出教麟父極有法度麟曾祖爲麟父授書王氏輒從機上暗記督令覆誦又常抱麟兒置膝上口授所記書年七十

餘非衣裙不出閨門其嚴肅謹飭如此督學宋扁其門

周氏劉大道妻年二十七夫亡飲泣節哀事奉孀姑族某欲圖產業屢侮益堅卒撫子昌運入庠守節四十年王氏閨雲行繼妻十五而寡撫前妻子如己出家貧母勸之嫁卒不聽焦氏張諫陞妻嫁五月而夫歿於蜀年十七守節事親撫遺腹子宏鰲娶婦生孫鰲尋父櫬又亡於蜀焦與媳胡鞠二孫茹苦終身焦卒年九十五胡卒年七十七張氏劉作棟妻夫亡撫三歲遺孤兼撫前妻子無何兩子繼亡偕子婦任氏復撫孤孫苦節六十年康氏任君成妻通孝經列女傳姑病割股姑歿撫其遺子與己子同馬氏秦彥亨妻夫亡子幼舅姑勸之嫁截髮自誓不櫛沐者三年卒成其志魏氏王伉妻夫亡撫孤大業長娶婦矣歸年二十六夫亡遺孤七月撫姑媳共鞠孫至成立王氏秦鄰楚妻年二十一夫亡遺孤七月撫

育娶妻未幾又卒痛指藐孫謂媳曰秦氏兩世惟此一塊肉耳其善撫之媳亦守節惜失其氏李氏生員李維京妻夫亡丹陽勤女紅積數十年身赴丹陽扶柩歸葬撫從姪承祧咎氏溫溥知妻幼通內則孝經溥知宦遊卒於粵氏年二十二遺子二齡數經兵荒甘荼茹蘖四十餘年

劉氏廩生秦甲佑繼妻幼通書史于歸六載夫亡前子九歲己子一歲守節課子屢值兵荒嘗誡其子曰年荒衆人之荒學荒吾兒之荒也子卒成立李氏李長春妻長春爲通州參將闖逆破關不知所終氏年二十四嚙指誓志事姑撫子羅氏李鴻德繼妻隨夫寓揚州乙酉城破夫死氏年二十五斷髮毀面於劍戟中尋尸負歸茹苦撫孤二十七載

薛氏來翼袁妻給諫大中姪女乙酉兵亂翼袁掖氏匿鄰家聞兵

噪聲與同族來鑑三女俱投井越日翼袞燭井中見數尸繫之出
三女俱斃氏猶微息過宿少甦臂折肋傷臥床數載後翼袞亡氏
年二十九撫二歲子苦節二十七年

李氏生員石崇極繼妻少寡或勸姑嫁婦得重聘可養生氏泣曰
姑勿慮針紉尙可爲生奉姑守貞數十餘年屈氏維大奇妻娶三
歲夫亡遺孤五月繼姑諷嫁不從逼之又不得鞭逐之氏歸依寡
母鍼帶自給撫孤稍長令省姑姑屬其叔逐之氏憤恨成疾卒袁
氏生員溫虬妻蘇州人歸虬未三年虬亡無子女獨居二十五年
嗣一子已授室又皆亡氏日啖豌豆數合飲井水一盂飢寒切身
者又二十七年宋氏王誠愬妻年二十夫亡矢志守節同治元年
回亂堡人悉逃氏家貧無食遂取蘆蓆自掩甘餓而死年六十八
李氏楊文第妻夫亡年二十八家貧行傭撫子回亂子遇害媳携

次子改嫁氏撫長孫辛苦全節七十三歲卒雷貞女許字徐玉林
童養徐氏玉林出外無音耗父母憐其少將別嫁女知不復歸寧
奉侍翁姑唯謹年二十七以疾卒武氏潘世順妻年二十九夫亡
遺孤三歲家貧父促之嫁氏曰如姑老子幼何終不聽父怒不復
往視氏傭工養姑二十餘年子亦成立賀氏張可賜妻可賜貿易
松潘鎮十八年未歸氏紡績養姑備歷艱辛可賜卒客死氏守節
三十六年楊氏張承策妻夫病危時即面誓曰餓死情亦甘畜生
事決不爲夫遂氣絕年十八守節六十病卒李氏王體良妻年十
六夫亡或勸改適氏泣曰我命可知矣矢志守貞丁戌奇荒年五
十餘閉戶自斃

康氏郝德有妻夫亡家寒織紵供子讀書入庠子出外媳亡又撫
三孫教之讀書備歷艱辛守節至四十年王氏張思孝妻年二十

三夫亡遺腹數月誓生子守節終身後果生子家貧無依母家勸之嫁不從遂絕來往卒撫子成立劉氏楊湧妻年二十九夫亡遺三子弟溥妻李氏年二十溥亡於外家貧姑老二氏傭工奉養撫三子成立俱苦節四十餘年

任烈女父元臣字苟四道子品級父母早喪童養翁家年十四品級夭即欲身殉因翁姑勸慰乃矢志奉養久之其叔父欲改字女泣曰兒終爲苟家人矣後叔母復勸女痛憤不食投井死嘉慶十四年旌張氏孫天扶妻夫病癰潰爛膿血淋漓氏侍湯藥躬澣濯備極勞苦三年如一日夫歿號泣送柩投墓穴以救得不死一日家人防少懈潛赴厨投甕水死道光十三年旌劉氏楊人滋妻夫亡葬畢墜樓死

趙氏崔祥妻年二十七生二女夫貧蕩將賣氏及女氏知恐爲所

給抱女投崖死馮貞女字李邦俊邦俊赴西域賈亡女聞欲自盡以養姑不果及姑歿終喪三年服毒死時年二十三以上道光十五年旌吳氏趙邦福妻夫亡家貧姑欲嫁之不聽歲饑姑與嫂各就食母家因扃戶七日不食自縊死咸豐十一年旌劉氏王智妻年二十九弟睿妻田氏年二十一壬戌北關陷恐賊縱火各分抱先人木主攜姪祥臨慶臨女水仙艾姐逃匿空院賊戕二姪氏恐受污置木主井側同二女及田氏投井死

馬氏溫文傑妻名宮雲忠憲公裔生員不興女年十六賊陷北關搜得氏驅迫以行至西門氏坐地賊欲捉臂使上車乃給賊曰毋捉我臂以矛來手可挽賊授矛氏持矛大罵自刺腹死閱數月改葬顏色如故田氏劉謙吉妻聞賊陷北城夫遇難攜子女赴水死兒婦張氏訓導溥女聞變急殮姑尸亦赴水死馮氏孫應元妻賊

至夫妻沐浴更衣對縊死侄婦郭氏亦自盡史烈女名貞奴父聲革字於趙賊破堡恐污投井死

宋氏李久觀妻年八十六歲撫姪禪爲子禪遇賊被害氏投井死禪婦鄧氏亦投井死段泰昌女年十五賊至欲掠以去其母朱氏護之且罵賊賊怒殺之挾女登車女哭詈墜車者三賊知不可犯亦殺之賈氏張楨妻因翁被賊害痛罵不已賊怒斷其手足死賈氏鄧某妻被賊強之從誑賊稍退急抱其幼女投井死

楊氏生員宋養楨妻聞賊至攜女與姑孫氏俱投井死葉氏王秉壬繼妻年十八聞賊自縊未死賊至掠氏不肯去大罵被殺李烈女年十六以不受賊辱被害又李灋妹名東英年十四罵賊不辱亦被害雷氏范守恭妻因護母不去賊傷其母大罵求死被賊支解封氏安兆田妻被賊執給以招鄰女賊縱之至鄰舍并側大罵

賊怒擲刀擊之氏投井死康氏安貴彬妻賊至欲污之氏怒罵賊刺以刀被傷暈倒頃復甦賊又至誘以好語仍罵不已賊搥殺之死者又有安貴璋妻賈氏相里氏楊連捷妻賊至服毒死段氏曹時同元儒妻賊至恐污與其妹琴仙投河死姚氏劉紀承妻賊欲逼其子三元妻周氏氏堅持大罵遂并被殺時賊不殺耶蘇教人村人多信之氏獨不信故至此杜烈女虞林妹名春英年十六罵賊不辱受重傷死惠烈女生員普之妹因母被害赴溝自盡潘氏二烈女秉鈞妹長一英年十五幼玉英年十三賊破簪欲擄以去二女大罵賊砍殺之李氏周萬泰妻賊欲降萬泰不從以戈刺賊賊圍殺之氏方匿草房見夫遇害即躍出罵賊賊怒寸磔死時年二十一孫氏監生吳繼瀚妻回亂避居東里武家堡遇賊大罵賊恨斷頭以死

張烈女名戒姐千總爾照女年十八回亂從母王氏避居邑北關城破王匿女賊以刃挾王去王大罵賊怒將加害女突出護母罵愈烈遂并及難時生員張埭妻溫氏生員張爾輝妻淡氏並子江之悉投井死張墅妻劉氏自焚死貢生張爾熾子西之爾動子寬之俱被害王氏張敏時妻賊至欲脅之氏被髮毀面罵不屈賊砍死

梁氏張善承妻罵賊遇害劉氏梁學正妻賊欲逼之大罵不屈被殺焦氏楊小山妻年二十七遇賊挾氏馬上罵不屈同女被害康氏賈居順妻被賊逼投井死黨氏武培蘭妻幼知書賊擄氏馬上哭墜者數恐以利刃弗顧罵不絕口賊怒以矛刺死武芳霞培鉞女年十五遇賊義不受辱投井死趙氏楊應庚妻賊入村潛避祖塋中遇賊大罵賊刺其腹出腸挂樹去劉氏楊轉政妻逆回破堡

被執不屈遂遇害徐氏丁友鴻嫂賊陷北關其夫與翁巷戰死之時友鴻尙幼氏匿友鴻于牀下極力翼蔽受傷身死趙氏李崇妻賊至投井死張氏陳照妻同夫避難惠家原侍夫病賊猝至挺身護夫夫被傷因罵賊被賊分屍死張氏李文燦妻被賊執逼指地窖備受箠楚卒罵不止賊恚割其唇舌死賈氏王延齡妻復煇女名芝姐年二十五夫亡守節賊至翁被執氏護救得免賊牽氏欲去出村賊他顧氏急赴祖塋觸墓石死

張氏薛均妻逆回至村氏擲磚擊賊賊執斷其臂復大罵又拔舌遂死張氏侯復才妻逆回欲擄之氏痛罵攜三子投井死劉金枝允義女年十六逆回薰斃其母于窖中女救未得抱母痛哭越日死毛氏孫化鷺妻年二十夫亡守節遭亂遇賊被害竇氏王夢筆妻逆回破窖氏抱子投崖死潘氏二女父建祿回亂二女匿崖穴

間長年十五幼年十三賊搜得欲劫去二女堅不屈賊怒以刀砍死段氏潘清泰妻回亂奉姑匿巖穴賊搜索財物氏護救被殺同氏女年十六避回匪于潘家嘗賊至將劫去罵不已賊殺之王應選女年十四捻逆至欲劫之女投井死李氏惠懷灋妻與弟懷浚妻郝氏遇捻逆劫之行二婦給言取物各投井死段冬青宗謙女年十四捻逆至被掠大罵遇害曹氏惠承緒妻張氏惠習文妻張氏惠爲政妻寨陷皆携兒女投溝死

蒲氏崔大明妻捻逆破寨擄婦女氏躍入泥坑中罵賊賊曳出殺之時崔樹榮妻郝氏年十五亦以不從賊被害許氏崔伯龍妻寨破投井死崔有智二女長十四幼十二賊擄至溝邊二女攜手投崖死張氏崔廷朝妻賊至與許振興女暨妹皆被脅不從同時遇害楊氏女父懷魁年十四捻至家人皆竄女避未及賊欲擄去女

乘間投井死

郭氏梁其昌妻北關陷同侄婦郭瀚妻焦氏投井死劉氏生員李含輝妻北關陷同兒婦喬氏孫女鳳姐長女員在庚妻外孫渭兒淑姐俱死於火蕭氏李本妻北關陷投火死

趙氏李棠妻與子宗昌妻秦氏聞賊至投井死李氏監生梁鳴和妻夫亡家貧茹苦撫孤北關陷罵賊不屈死張氏崔書誥妻捻逆擾村罵賊死蒙氏王清昌妻避賊高窰窰陷捻逆欲犯之憤罵投崖死趙氏張鳳翥妻夫亡守節三十餘年賊破窰死之

咎氏孫吉祥妻回至罵賊不屈遇害張氏孫培萬妻捻逆擾村逼之赴井死馬氏李德昌妻聞捻匪至村投井死王氏張浩妻賊傷其子氏罵之賊強載氏馬上墜馬罵更厲曳里許遂被殺惠紹德女名春姐年十四遇賊掖之行女大罵以刃加頸仍罵不止賊遂

殺之張氏惠海林妻年十八而寡撫姪事翁姑素有賢聲捻匪至村不屈被傷死督學旌其門王氏張朝鳳妻年二十賊悅其色爭執之氏大罵不已賊挾之行乃被髮毀面臥地罵益厲被叢矛刺死王氏張昌純妻年十九聞賊警同張承范妻段氏投井死王氏張堃妻夫亡守節四十餘年捻匪至罵賊遇害李氏王治平妻與媳孫氏高氏孫媳段氏被執不屈同遇害汪氏王道綸妻遇賊殺別婦女輒罵之亦遇害史氏相里文德繼妻年十九而寡事姑撫前子與己子皆成立守節四十二年回變遇賊不屈被殺周氏相里應奎妻逆回亂同夫逃難遇賊夫被害氏痛不欲生一女僅五歲宗黨有憐而卹之者不受及母來視已數日不舉火即以女託母母勸之嫁泣曰寧死不嫁遂不食十餘日死時年二十七歲吳麻氏夫失名年五十餘回亂語人曰此何時可受辱而生耶遂

整衣焚楮服毒死何氏張秉恭妻年二十六孀居奉姑撫子兼盡
孝慈回亂遇害李氏穆其恪妻素賢明回至開門罵曰猪賊何竟
反被傷投井死楊氏穆其慎妻寡居事兩世孀姑以孝聞教子亦
嚴賊至罵之遂被害

何氏李珍妻逆回至逼氏罵不屈支解死劉氏李士瑩妻回亂攜
子投井死梁氏王仲洲妻罵賊死李氏王景燭妻同治壬戌七月
氏送夫妹嫁某村甫至家賊至家人悉竄氏與夫妹牽衣投井死
党氏周玉桂童養妻年十六擒匪至投井死時同死者李金妻劉
氏李長發妻韓氏喬氏李洲妻擒逆擄夫去氏聞之忿激同子根
兒投井死楊氏女名十姐年十六擒逆至投井死咎氏周良棟妻
回至大罵不屈被害翟氏周環妻回殺其夫氏投醋甕以殉路氏
周賜妻年八十聞賊至投水死李氏周福榮妻回至投崖死同時